

Datum: 06. 11. 2006.g.
Broj: 06-01/089

Svim medijima - dostavlja se

Nevidljive reforme

Prema ovogodišnjem CPI, u BiH nije zabilježen napredak u suočavanju i borbi s korupcijom zauzevši 93-98. poziciju na globalnoj listi

Berlin/Banja Luka, 06.Novembar 2006.g--- Ovogodišnji Globalni Indeks percepcije korupcije - Corruption Perceptions Index (CPI) Transparency International, najreprezentativnije svjetsko istraživanje o korupciji obuhvatio je 163 države, a Bosnu i Hercegovinu po četvrti put. Indeks rangira države od one sa najmanjim stepenom korupcije do zemalja u kojim je korupcija najprisutnija, na osnovu ocjene koju određena država dobije (ocjene se kreću u rasponu od 10 bez korupcije do 0 apsolutno korumpirana zemlja), a na osnovu relevantnih istraživanja od kojih se Indeks sastoji.

BiH je u protekle tri godine bilježila konstantan pad na ljestvici CPI, dospjevši do ocjene 2,9 i djeleći 88 do 96 mjesta i na taj način svrstavši se među najkorumpiranije i najnerazvijenije zemlje Evrope. Ove godine BiH dijeli 93 do 98. poziciju zajedno sa Argentinom, Armenijom, Eritrejom, Sirijom i Tanzanijom, zadržavši ocjenu 2,9 što ukazuje da je pad na listi isključivo nominalan uzrokovan većim brojem zemalja koje su ove godine obuhvaćene CPI.

“Iako je pad na ljestvici ove godine konačno zaustavljen, rezultat ovogodišnjeg CPI je razočaravajući, a ključni uzrok je prije svega nepostojanje političke volje vlasti BiH za borbu protiv korupcije” istakao je predsjedavajući odbora direktora TI BiH i član međunarodnog odbora direktora TI Boris Divjak prilikom prezentacije CPI u Banja Luci. “Bez jasno izražene volje vlasti, sadržane u provodivoj, sveobuhvatnoj, državnoj strategiji borbe protiv korupcije, uskoro ćemo se naći na samom začelju tabele”, zaključio je Divjak.

Istraživanja koja su vršena u proteklom periodu ukazuju da je najveća prepreka za borbu protiv korupcije prisustvo korupcije u samom vrhu vlasti, te izuzetno izraženo prisustvo efekta ‘zarobljene države’, odnosno neprimjerenog uticaja moćnih oligarhija i kriminalnih grupa na vlast. Iz godine u godinu prema svim relevantnim istraživanjima političke partije predstavljaju najkorumpiraniji segment društva, a koje iz državnih kompanija i kroz zloupotrebe procesa privatizacije i dalje izvlače enormne svote ilegalno stečenih sredstava. Tužilaštvo i pravosuđe u BiH i pored provedene reforme nisu pokazali značajnije rezultate u procesuiranju korupcije i zajedno sa policijskim strukturama i agencijama za provođenje zakona, koje su u znatno većoj mjeri ekponenti interesa političkih partija nego institucije čiji je rad utemeljen u zakonu, predstavljaju sastavni dio problema.

Poređenje sa zemljama regiona pokazuje da BiH zaostaje i za zemljama najbližeg okruženja. Hrvatska je ove godine na 69. poziciji sa istom ocjenom kao prošle godine 3,4, dok Srbija iz godine u godinu bilježi konstantan rast, pa je tako ove godine prestigla BiH i nalazi se na 90. mjestu sa ocjenom 3,0 što predstavlja osjetan rast.